

23 MAR 2002

DR MAHATHIR HADIRI RAPAT RAKSAKSA DI LANGKAWI BULAN DEPAN

LANGKAWI, 23 Mac (Bernama) -- Kira-kira 10,000 penduduk Langkawi akan berhimpun dalam satu rapat raksaksa di sini bulan depan sebagai tanda terima kasih kepada sumbangan Perdana Menteri Datuk Seri Dr Mahathir Mohamad membangunkan Langkawi.

Pengerusi Barisan Nasional Langkawi Tan Sri Sanusi Junid hari ini berkata Dr Mahathir dijangka berucap pada majlis bertema "Terima Kasih Perdana Menteri" itu yang akan diadakan di Dewan Pameran Antarabangsa Mahsuri di Padang Matsirat di sini pada 5 April.

Perhimpunan yang julung kali diadakan itu bagi mengucapkan terima kasih kepada Dr Mahathir atas usaha yang telah, sedang dan akan dijalankan untuk memajukan Langkawi sehingga terkenal ke seluruh dunia, katanya pada sidang media di Lapangan Terbang antarabangsa Langkawi di sini hari ini.

Mengikut aturcara lawatan sehari Perdana Menteri ke Langkawi itu, Dr Mahathir dijadual merasmikan sebuah kedai bebas cukai di Lapangan Terbang Antarabangsa Langkawi sebelum merasmikan Persidangan Umno Bahagian Langkawi di Kompleks Sukan Langkawi di Kuah.

Dr Mahathir juga akan mengadakan perjumpaan dengan ketua-ketua jabatan, agensi kerajaan dan swasta serta perjumpaan dengan pemimpin BN dan tokoh-tokoh masyarakat di sini sebelum menghadiri rapat raksaksa itu pada sebelah malam.

Sanusi berkata ketua-ketua komponen Barisan Nasional di peringkat pusat dan negeri akan dijemput menghadiri rapat raksaksa itu.

-- BERNAMA

NH RHM